

卷五

人物下

文學

清

王仁傑 縣境人康熙丙子舉人大挑候選知縣嫻古文氣機流暢一時碑銘傳記多出其手

劉柄 邑南佛爺溝人乾隆初歲貢溫文儒雅為一方碩士平生勤學敦品設帳課徒無事不入公門今鄉老猶有稱之者

鄭鍾 縣境人乾隆丁酉科拔貢嫻詞賦書法尤佳

劉魁 城內人乾隆間優貢朝考授教職曾任直隸大名縣訓導文化頗著

海城縣志 卷五 人物 文學

劉敦倫 城北教軍場人乾隆年恩貢學品純粹尤精於易嘉慶九年主講他山書院我邑文風因以不振子汝亨邑庠生孫可訓均學行優美有聲於時

董琪樹 字玉林城西安家堡人早歲列膠庠精四音尤邃於易以理學著聞為文拔俗脫帖括氣一時學子咸宗之進士龐家淦佟炳麟等皆其高足弟子平生敦孝行尚友愛吟詩有讀盡五車書孝弟而已矣之句以風勵世人讀書具隻眼喜著述有古文詞律絕詩歌中庸說河圖說先後天說孟子論文若干篇先世董子仲舒閣名繁露遂以二字名其文集梓板行世年八十卒子元朗文庠生

李之蛟 字龍飛城南關人歲貢生經術宏通書法超逸

王德泰 邑東王石頭堡子人嘉慶間舉人詩賦銘誄簡老冠時

劉廣濤 城北白廟子人嘉慶間拔貢設帳千山無量觀其學以六經古文為根柢遼陽王



太史爾烈十八歲時從受業深得其傳後爾烈充侍講官所得庫書必歸劉氏一份故劉氏家藏庫籍最多子榮春邑庠生學識淵博孫二長克家次克猷均諸生爲邑名宿曾孫際和庠生甲午亂後迭遭兵燹藏書蕩然家亦式微

趙德森 縣境人乾隆己酉拔貢文體簡潔入古長於傳記

李岱 字岳瞻城北張胡臺人邑庠生作事有毅力曾監修文廟勞勩卓著博通經史爲

我邑北方儒學先導

朱讓 字允恭城南朱家屯人有明宗室或曰宋徽國文公之苗裔博學能文弱冠遊泮

隱居不仕課徒四十餘年郝明府鍾麟其高弟也年八十九卒

王鴻業 字耀東城南虎莊屯人邑庠生博學能文多善行二子元治元善先後成進士皆

官知縣有政聲

海城縣志 卷五 人物 文學

王朝文 字酉峯城內人拔貢生性古鯁工書筆力遒勁肖其爲人著四字鑑略一書頗便

初學晚年擅岐黃術施方療疾而不取貲著醫書數卷未付梓而卒子作綸亦明經有學行

李光文 字載道號富然城西南大感王寨人縣學生員有品學以詩禮傳家爲一方士族

之望

李光耀 字應實文庠生與兄光文同案入泮時稱韓家父子李氏兄弟

李光輝 字充實光耀弟也歲貢生候選訓導淵源家學品行素敦未仕卒

李天一 字象乾號廉泉光文次子幼承庭訓早歲入泮旋選明經以訓導用爲人心地慈

善平生喜閱先賢語錄及因果善書常講演以警後人又善詩歌多可傳誦者

李翰一 字西園光耀長子文庠生幼承家訓品學俱優爲士林推重

李寶田 原名德一字硯農光耀三子歲貢生覺羅官學漢教習以教授用未仕卒



李錦堂 字芝庭號紹天歲貢生天一次子設帳於亮甲山雙陽寺等處一時遼海科第中人多出其門性好善見義勇爲光緒十四年河西水災民大饑籌辦賑務勸設粥場全活災黎無算

李相一 字陶山居大感王寨文庠生講學授徒門下多知名士爲一時宿儒

李松年 字秀叔號菊隣相一子金印從弟也歲貢生候選教諭工詩歌善書法隱居不仕以講學授徒終

劉宗泗 字文川城北南臺人以歲貢考取宗室官學教習例用知縣家貧未仕品行端正時藝超羣受知於邑侯強杏齋延署內課讀又設帳鄉里從學者衆年六十餘以疾卒於家唐玉璞 字惠昌城南腰屯人道光間廩生性慈善學行可嘉設塾有年遇貧家子弟不取束修鄰里有貧困者嘗出資助之同治三年卒春秋六十

海城縣志

卷五 人物 文學

三

孟德成 字立堂城南葫蘆峪人歲貢生平生蓄道德崇實學不尚詞華與鄰村盧韓兩氏結通家好累代詩書率得其傳晚歲家居與老妻對坐忽自言曰余於某日數當死促爲料理後事妻以其言妄置之然默中亦略爲預備至日冠帶臥牀上家人環伺門人盧從訓聞其異謁榻前呼問曰蘭亭序篇內奧旨悉明乎對曰未也爲從首至尾一一講解畢向衆言曰無戀戀余就道去也遂逝時村人某由城歸至龍臺鋪村南見有輿蓋煊赫騶從夾道風行而來者竊謂何處貴官儀衛之盛若是比近視之則輿中端坐者德成也方欲展問倏忽已查至家知其已卒咸詫異之

孟海樓 字仙州邑南土台子人附生熟於掌故尤精易理晚年爲諸生講經入帳聽講者恒數十人

梁有成 字純夫邑西南虎獐屯人家學淵源酷嗜詩書案置數百卷終日誦讀於經史確



有心得性公正好善惡惡出於天性同治某歲大祿縣令鮑師釗假皇差名苛歛民財有成力諫弗納乃赴京具狀都察院經御史彈劾鮑令去職當時邑人咸以見義勇爲稱之

李彬 字均適邑東南海龍川人幼嗜讀有品學道光間恩貢設帳授徒一方俊秀多出其門卒年七十五

龐應奎 字東五住城內花園歲貢生品端學粹善書法頗得顏魯公筆意其文藝見他山課士草又自詠五律詩若干內有白髮不知老青氍獨忘貧之句其胸次亦可想已

龐增益 字心竹城北泥溝鋪人歲貢生性和平多雅量書法最佳考宗室官學漢教習以知縣用未仕年八十餘卒於家

韓秉道 字宗魯城南鄧家台人歲貢生工夫深純有手批高頭四書講義高頭七經講議並著詞賦韻言諸書

海城縣志

卷五 人物 文學

四

韓述公 字望選鄧家臺人歲貢生設帳遼海兩縣學規嚴肅講解明通進士龐家淦爲其高足弟子

韓志古 字香圃鄧家臺人歲貢生選用吉林賓州教諭因告疾辭未就任家居力學書法經義講解皆優

韓光璧 五樓鄧家臺人恩貢生設帳多年文章詩賦頗負時譽他山課士草其文藝有登錄者

韓光煜 字熙亭鄧家臺人歲貢生鄉闈取中臚錄官後考錄滿洲覺羅漢學教習當時文名頗盛

尹三聘字玉泉城內東關人回族文庠生習掌故通經史爲文近古有名於時所撰禮拜寺碑文寄託尤深一唱三歎有脫離宗教慨慕孔教大同之想



魏秉鈞 字伯衡城內北關人咸豐末年恩貢生喜考據能詩善書家居不仕爲本城富家處人和易善雅諧無驕矜氣見者悅之

盧聚五 字星樓邑南盧家屯人歲貢生爲人樸厚設帳課徒受業者頗多未仕卒子二長兆政附生出繼族兄次兆敏業儒有學行孫數人多學校出身次孫維時官濱江縣知事

趙鍾彥 字英三原籍山東歲貢生移居縣城東南勒馬峪學有根柢工舉子業城東多山風氣阻塞自鍾彥設教讀書人日衆東方士子多出其門子二鴻飛鴻猷俱邑庠生

宋懋官 字德園居邑西四臺子父希安山東掖縣諸生年二十偕弟冠英泛海來奉愛海城土俗深厚遂家焉懋官幼承庭訓成童通經史年十八入泮旋食餼選明經科三上鄉闈不第因里居授徒英俊咸歸之蔣太史維垣閱孝廉中剛皆其門下士也又性孝事親善色養叔父冠英業商嗜博一擲動數百金懋官悉代償無吝色且服事益恭其篤於懿親有如

海城縣志

卷五 人物 文學

五

此邑紳重其行特贈德隆望重匾額以表揚之年六十八卒

宋藻銓 字衡三懋官中子也恩貢生以教諭用性敏精心算九歲時聞人核算賬簿所得總數未及宣藻銓已脫口出無毫厘差咸驚奇之少承家學通諸經尤邃於毛詩爲文情真語摯從至性中流出張大令芷生閱其文擊節歎賞因想其爲人謂不可以時藝輩視之以故月試拔前茅縣試名列第一他山課士草載其文獨多後襄蔣掖臣司馬幕政有志經世由教諭改官知縣未及補用卒年四十八子作賓優貢生

李澍齡 字雨濃一名如碧別號龍石明經李斗南子幼承父訓成學最早弱冠領鄉薦才名藉甚當時有才子之目所居村曰繞溝澍齡爲更名曰青蓮泡自號小青蓮蓋以李太白自況也工駢文善詞賦書法自成一家倜儻不羈數奇不偶卒於家

周 偉 字怡園城南蓋家屯人性沉重寡言笑髻年列膠庠文有英氣爲學使所賞拔中



同治丁卯科舉人主講奉天萃升書院二十餘年門下士掇巍科致通顯者甚多庚子亂歸里旋卒

周 儒 字聘園怡園弟由拔貢中同治某科舉人才氣過人所作制藝爲一時學子所誦法設帳授徒又迭主遼陽海城書院講席未仕卒

王日章 字雪窗城西小馬頭人歲貢生父守金山東黃縣諸生日章性誠實幼承庭訓篤於學遂爲一邑名宿設帳半生成材甚衆尤工詩有和呂祖降乩雁字詩三十首爲一時所傳誦

王獻章 字瑞圖日章弟歲貢生學問文章俱有根柢善講四子書引証經義層出不竭當時經學我邑推王氏爲第一

王恩甲 字冠庭獻章三子幼承庭訓成學最早年十七父歿設童子帳以自給父門人丁

海 城 縣 志

卷五 人物 文學

六

鶴年館於鄰村恩甲課餘輒往請業因而文思大進弱冠入泮年二十八舉於鄉受知於邑宰張芷生延至署課讀後受本邑聘主講他山書院十餘年月課衡文精細士林咸服晚歲家居服布衣飯脫粟日督傭保操作孜孜不息嘗曰大禹聖人惜寸陰陶侃賢者惜分陰吾輩不及古人敢暇逸乎得閒與農老講求治安鄉人賴之年逾七十卒

閔中剛 字蘭圃邑西藍旗堡子人天性誠篤魯而好學終年兀兀不倦年逾三十始博一衿赴試秋闈十餘次志終不懈卒中同治丁卯科舉人生平重禮法與妻葛氏相敬如賓有梁孟遺風年八十卒

傅中泰 字曉村邑北周小屯人生而穎悟工舉子業中同治甲子科舉人品端學粹尤擅美書法

趙福昌 字海峯邑西柳公屯人性剛工制藝中同治癸酉科舉人課徒有年進士趙俊升



其高弟也後患精神病卒人多惋惜

趙俊升 字秀臣城北柳河子人父光璧邑諸生俊升幼承家學復受業於崔秀峰趙海峯兩先生年二十八領鄉薦次年捷南宮殿試授主事籤分戶部以母老不遠遊遂絕意仕進居家養親十餘年以孝聞母歿哀毀逾禮尋卒

王亦顯 字榮階邑西老牆頭人同治年舉人學淵品雅拾灑洛關閩餘緒從事探討以期見諸實行時有道學之稱弟竹坡諸生亦愛宋儒學說子三長伯仁附生次仲誠份生三季明歲貢生均能紹其家學

張德春 字華亭邑西沙河沿人同治某科舉人廣文德慎之兄也敦品行重道德終身以出入官署爲戒人不敢干以私鄉里重其人咸傾慕之又精醫術常施方濟人晚年患腿疾不能下牀者七年子松生有孝行

海城縣志

卷五 人物 文學

七

常百福 字介臣滿洲旗人住牛莊北關光緒乙亥科舉人家式微以課徒自給學粹品端人皆欽仰未仕卒

孫繩武 字曉峯邑西北古樹子人歲貢生性剛正文章書法並工同邑陳孝廉希卿嘗以翰苑才期之以數奇屢困秋闈一時世族慕其學品爭延爲師繩武循循善誘待弟子有恩誼如錫聘之鑠聘九諸名士皆出其門年七十五卒

崔培林 字秀峯邑西蕭姬廟人歲貢生學品俱優以課徒自給門下多佳士進士趙俊升舉業之根柢得其教授居多

崔鳳飛 字晉齋邑西石灰窰子人恩貢生例授州判未任子葆謙宗室漢教習父子均有學行士林咸稱之

張濬川 字喆軒城西北大莫七屯人咸豐年歲貢生以誠實禮讓處鄉閭里人化之多勉



爲良善年七十餘卒子象賢亦明經

張象賢 字仙橋歲貢生明經張濬川子也幼承庭訓事親孝晚歲優游鄉里對父老則論家庭教育遇子弟則示以孝悌大節其與人爲善之心有似王烈民國初年某日忽病從容整衣冠卒有董七先生者儒醫也與象賢比鄰居一夕夢象賢冠帶入曰余署中事繁相契莫我二人若也煩往助理醒以語人咸嗤其妄未幾果卒

楊雨滋 字喜亭城南雙廟子人附貢生善事親親病服事尤勤兄弟四人仲出繼與叔季兩弟同居始終友愛雨滋性瀟灑工詩賦課徒數十年得其衣鉢者甚多光緒甲午日兵入境鄉人惶駭欲遷避雨滋持以鎮靜勸鄉人勿恐遂倡辦團練共保治安人咸感之年五十八卒子嘉蔭明經歷任平泉密山和龍等縣稅捐局長

李鴻賓 字湘浦城北隄軍堡人滿洲布衣也疏脫不羈喜吟詠嗜白香山詩得句輒神肖

海城縣志

卷五 人物 文學

八

少與王鵠臣高習儔兩詩人相友嘗携詩囊遊都下所交皆名流共愛其才咸以遠大期之因數奇三試未售初不措意時携奚童出東郭作汗漫游歸折楊柳賦黃金縷一曲瀟灑風流有出塵之致某歲適瀋水與明經魏子亨布衣袁甘泉太學高馨竹茂才王上之進士白亞珍孝廉保會卿諸詩人結藕蘂吟社由是詩名益噪晚年目盲以貧士終著有賞心齋詩集梓板行世

羅士雲 字錦堂城北甜水溝子人爲人誠樸鄉里稱長者一生設帳授徒後生多被成就晚年進德彌篤經邑紳公舉孝廉方正年八十餘卒子贊元庠生孫海濱師範科貢生均有學行

尙昌英 字斐卿邑東南大新屯人附生以軍功保通判充宗祠世管佐領性個儻喜談書史手不釋卷著有斐然堂詩草二卷



王海源 字液清邑西小河口人歲貢生曾充本縣參事會參事員年七十餘卒於家

周 慶 字子衡城內人歲貢生性端方舉止威重見者敬之課徒有年學子沐其教澤皆悅服年七十二卒

祝漢東 字仙洲城東老爺廟溝人恩貢生以教諭用博聞強識文藝詞氣充沛設帳授徒有年未仕卒

祝華封 字多三邑東樓房人歲貢生選用訓導幼失恃事繼母有孝行以帖括訓士一時學子多遊其門光緒二十八年地方不靖辦東路十八屯團練盜匪絕跡三十二年充本鄉鄉正創辦學堂十餘處旋充第一鎮自治會總董年六十七卒

祝堯封 字錫三華封弟光緒丙子科副榜學品淵雅爲文氣勢浩瀚尤工篆書設帳遼陽有年如尹佐湯尹濟湯胡雲程等皆其弟子也歷膺安徽知府楊惠峯奉天學政李培元之

海 城 縣 志 卷五 人物 文學

九

聘爲課子弟年四十九卒

王猷升 字輯五樓房人歲貢生性和夷爲學工夫純粹制藝典贍設帳多年恒以勵品勗其門人一生操行不苟士林咸欽之未仕卒

陳丙榮 字漸九城東南勒馬峪人邑諸生少穎悟遊於趙英三先生之門文思銳進同學諸友莫能或先晚歲家居布衣脫粟自奉儉約鄉里化之

田毓秀 字子芳邑西北仙里村人附生設帳城內有年教授有方士子多歸之優貢王乃香附生李蔭楷姚文治皆其高弟也年六十卒

李際昌 字屬春邑西牛莊人歲貢生性敦孝友重義輕財兄弟四人析居後際昌獨奉祖父母父母以居家貧設酒肆以養親甘旨無缺諸兄弟晚歲貧甚際昌悉留養於家歿爲營葬待兄子如己出幼使讀長爲授室謀職業能自立而後遺之際昌性爽直見不平事必鏘



除之牛莊當商向章利取二分光緒初年河西水災質物者多當商乃賄通旗署利改三分貧民病之際昌爲赴省請於大府仍復舊制民皆稱便際昌有幹材被舉爲商董遇病商事與官署抗爭商民倚重年五十一卒長子心曾能讀父書由附生歷官至熱河道尹

白夢庚 字蘊章牛莊城內人歲貢生候選教諭有學行躁釋矜平無疾言遽色而家訓甚

嚴日以勤學勵其子弟從子雲達優貢生以大教習官山東知縣鶴田弱冠領鄉薦均負時譽

鄭 灑 字松泉牛莊北關人文庠生長於詩賦著有詩集待刊甲午之役縣城陷駐牛官軍聞警先逃土匪蠢動街市岌岌可危紳商欲辦團練苦餉無所籌灑慨允之立辦起闔城賴以保全至今父老猶稱道弗衰子二次芬官吉林依蘭縣知縣

關恒昌 字月亭滿洲旗人居關沙河沿幼靈敏異常童弱冠掇芹性情瀟灑解音律善詩

海城縣志

卷五 人物 文學

十

歌中歲家落不戚戚於懷年七十卒無子以姪德鈞爲嗣

鄭殿臣 字六卿牛莊人附生爲人誠篤工舉子業筆力沉雄胚胎於清初諸大家並管韞山專集屢試秋闈不售以課徒終

劉競辰 字春浦牛莊人歲貢生有品學平居竟日端坐無怠容有宋儒灑洛之風於經史子集無不探討著述甚多家貧無力付梓故不傳從子興浦爲名孝廉其學皆得力於競辰

岳玉峯 字朗亭牛莊人由歲貢考取宗室漢學教習性豪放才氣過人與王堯山劉春浦劉希明時稱四才子

王麟書 字玉臣牛莊人堯山從子也幼承家訓早歲遊泮弱冠舉於鄉天性孝友諳練老成曾受營口海關道某公聘充幕賓視事必恪口不言私某公深器重之年三十卒

王壬林 字瑞臣牛莊人父秀民爲邑名儒人稱堯山先生壬林少孤力學博通經史書法



尤佳年弱冠補博士弟子員屢試棘闈不第隱居教授變法後歷充中學師範各校國文教員管邑侯鳳龢奉令修鄉土志未就去任壬林與邑庠生趙中鵠歲貢生張文藻續成之年五十六卒

朴文成 字德三牛莊人附生天資聰敏文藝高出流輩年五十餘卒

戰永修 字崑圃牛莊人附生家貧少曾習商年餘復入塾學文藝工夫純篤數載入泮以課徒自給一生言行謹慎堪爲矜式

郭樹勛 字麟閣牛莊人附生有學品居身樸素帛冠布衣宴如也子作藩邑諸生

孫德彬 字雅亭邑北新台子人幼聰慧髫齡入泮光緒戊子科舉人氣度安詳書法工整課徒數年惜未大顯年三十餘卒

李鴻毅 字植嘉邑西高坎灣人先世業農家素封天資英敏與從弟鴻達同年入泮庚子

海城縣志 卷五 人物 文學

十一

秋縣城失守地方糜爛鴻毅創辦鄉團閭閻賴以保安後鄉會成立充鄉正旋復任縣議事會副議長地方收捐處總董宣統己酉科考取優貢朝考二等授縣丞未幾卒

于祖培 字雨臣城北三里橋人學問深邃文章清健年弱冠以院試第一人入泮宣統己酉科拔貢朝考授府經歷分發直隸抵省未蒞任卒

鄭葆光 字芹浦邑西朱家窪子人附生爲人方鯁不苟合於時日寫功過格以自課或以拘謹譽之而葆光繩墨益嚴訖不爲動以貧儒終

王景勛 字麟閣隸漢軍旗邑西南上夾河人附生性誠樸貌莊重擅長詩賦設帳有年於後生多所成就講四子書尤能發明精義爲一時所推許

王鶴齡 邑西紅草泡人附生博通經史性剛正尙廉隅人不敢干以私里有紛爭善排解遇狡悍者嘗厲聲呵斥或具樽酒道歉一笑散去事遂息今鄉老談其事猶稱揚不置云



劉世榮 字聘三邑南葫蘆峪人恩貢生以教諭用未仕卒

于登瀛 字子俊邑西南坯場八里河人附生爲人和易設帳十餘年待學生如子弟年逾六旬卒

周乃齋 字耘畦怡園孝廉從孫附生海齡子也弱冠補博士弟子員性誠篤言行不苟曾充牌樓屯高等小學教員又充本鄉大感王寨議事會議長兼兩等小學校校長實心任事成績日著旋以自治停辦乃齋歸家未幾卒

趙凱廷 字錫九坯場八里河人邑庠生性聰慧年十八始入塾肄業數載學大進入泮後困於棘闈遂隱居教授以終年七十無子納妾生二子年九十卒

趙熙齡 字錫九城南小河人文庠生幼英敏善書法秀潤工整有臺閣氣屢試棘闈每出場同人索觀文稿莫不擊節稱賞期以必售及榜發竟名落孫山熙齡既不得志於有司意

海城縣志

卷五 人物 文學

十二

甚快酒後狂吟慨當以慷見者羨其才而又惜其遇也以諸生終

何興國 字个臣城南昆廬寺人文庠生性瀟灑有才氣工詩善畫並精音律年五十餘卒子果忠高等警務畢業官至察哈爾警務處處長

韓光琦 字玉峯邑南鄧家臺人天資聰穎才氣過人年十二應童子試十九歲以縣試第一人入泮嗣從舉人周儒受業學益進三試棘闈不第遂淡於仕進年五十餘卒弟光恩亦

諸生

康乃慶 字俊廷城西前三家子人附生光緒甲午科謄錄少負文名性抗爽有烈士風早亡人多惜之

趙中鵠 字嵐亭邑西南上夾河人少貧酷嗜學業師汪蓉舫愛其才教之不取修脯年十八游泮儻有大志既而屢困秋闈設帳授徒似絕意仕進者庚子亂後慨國勢不振往往



對酒悲歌聲淚俱下不知者目笑之以爲狂而中鵠不顧也清末痛民無愛國心嘗借潘烈士志仁投海事編爲戲曲名喚同胞以警覺之宣統初曾赴京請開國會弗省辛亥秋武昌起義中鵠聯同志組織革新急進會部署略定親赴莊復各處冒萬險卒編成學生義勇團鼎革後遊京師民國元年秋奉命充稽勳局關外調查會會長三年袁氏稱帝大索黨人復南走歸廣東軍政府旋補國會議員主張北伐最力積勞致疾卒於廣州寓次中鵠素嗜佛學奔走國事足不履故鄉者近十年每至窮迫時輒誦佛自遣平生喜著述遺有香雪子詩草嵐亭隨筆懺悔錄白話新劇談佛經釋義諸集待梓

姜樹棠 字文閣城東關人附生性高曠善詩庚子亂城陷避居遼界吉洞峪有徐珍者因地方糜爛倡辦鄉團保安數百村聞樹棠才聘充文牘倚重如左右手辛丑春宰邑王順存赴騰鎮擊匪請徐珍帶勇千人協勦匪逸去陰賄通譯唆俄官將邑宰調省看管又派俄隊

海城縣志

卷五 人物 文學

十三

卸鄉勇槍械危急萬分賴樹機警先事撤防繞道從容而去樹棠臨事有急智英謀果斷濟變才也第運蹇無奇遇竟以諸生終

戴克元 字縉忱邑西大富甲屯人附生性狷介有學行曾任牌樓高等小學教員事親甚孝病疴二載瀕危時念老母尚在深憾於心自撰棺聯云一世空談愛祖國九原長夢繞慈幃書畢溘然長逝年四十八

林春藻 字旭園城北姚千戶屯人附生能文章工尺牘先後膺編修蔣維垣同知李鶴年知州彭筱伊張筱川等聘充教讀兼書啓並充某縣書院山長晚歲倦游歸鄉會成立被舉爲鄉正期滿告退春藻村中地分鉛簾二場年納差銀民國元年清丈二場地場官擬領此地激怒地戶聚衆抗丈勢甚洶洶春藻恐釀重案力勸止之代民申訴卒得直地歸民領不再納差村人啣感不已



張祖謙 字益亭牛莊人附生天資英敏爲文爽利並深於易學早卒

張天漢 字濟川牛莊人附生設帳有年時藝文筆輕快學子得利甚易幼子耀庭亦諸生

張炳寅 字雨亭牛莊人歲貢生性純謹有品學著有醫書子乃峯師範畢業

楊恩桂 字海東邑東南楊家西溝人少貧篤於學明經王申錫重其人延至家以課子姪

光緒初入邑庠由是名日噪設帳講學清末變法歷充海龍川八岔溝等處兩等小學校國  
文教員以積勞致疾卒年四十有一

王承志 字海川城東南海龍川人性聰穎好讀書尤嗜數學二十五歲入邑庠研究益力  
能發明數學真理光緒三十二年在本村倡立兩等小學校嘗語諸生日余生平研究數學  
稍有心得必不吝所與也願諸生勉之在校積勞病故年四十八人皆惜之



孝義

明

葉洪 邑人幼孤依母度日嘉靖間母病思食肉麵家貧不能辦乃傭於人得麵一升又苦無肉遂割股肉以進母食之病遂愈

周顯時 邑人父愛幼子臨終以三千金子之顯時終身篤友誼若不知其事者後官至總兵

王之召 邑人字仲仁號龍山總兵重祿之子孝友出於天性父母疾親侍湯藥衣不解帶居喪哀毀骨立兄早卒教弟之弼之榮並姪永昌俱成名萬歷十一年之榮以武舉赴都會試還至沙河被擄之召方寢疾聞之益篤泣曰余兄弟四人兄死弟離大變也促之弼往尋囑曰生則傾吾資以贖彼歸歿則讓吾產以居彼子聞者太息

海城縣志

卷五 人物 孝義

十五

清

繆鴻業 邑北柳河子人康熙間附生天性敦篤事父母純孝親沒廬墓三年朝夕哀號聞者感泣不忍再過其廬有王褒門人廢蓼莪詩意邑宰王沛恂嘉其孝行因書中孝節義四大字於學宮照壁而以洪業廬墓事註孝字下以示風勵

律鴻德 字容海城西大富甲屯人家素封品行敦篤事母以孝聞一日園中失慎村衆驚呼奔救容海亟請曰願衆無譁恐驚老母如是者再時明經董琪樹在側聞而瞿然曰容海於造次顛沛時猶不忘母則其平日可知咸豐元年邑紳公舉孝廉方正琪樹爲作序以闡揚之

董澤普 字樹堂居牛莊北關至性過人同治五年流寇破牛莊父起功觸賊怒將置諸死澤普號泣哀請願以身代賊不聽卒刃之澤普戟手痛罵賊連刃之神色不變竟殉父難亂



定邑人哀之祀於孝子祠

任永和 牛莊西南關人業商性素孝同治二年三月十八日牛莊遭火劫火從永和比鄰起時永和在外聞變喘汗歸抵門屋已火家人咸逃獨八十四歲老母走避不及永和情急冒煙入力負母左衝右突適火勢猛熾烟漲風號烈焰噴吐無從闖出門外徒喚奈何永和遂暈倒同母焚死火熄收檢殘屍永和手猶握母臂見者酸鼻

汪步瀛 字蓉飭邑西南東門口人附生篤天性善事親母歿於塋側築室行廬墓禮喪畢歸父尋歿復居廬前後共六年期滿時孝子心猶以爲速其祭墓告別文悽惻纏綿聲絕痛聞者皆流涕步瀛學行爲士子所欽廬墓時就而請業者踵相接悉教之無倦卒年五十有八

齊海 城北駙馬營人四歲而孤母李氏矢柏舟志海長事母有孝行時或赴鄉鄰宴筵中

海城縣志

卷五 人物 孝義

十六

饌有母未嘗食者終不下箸同席屢促之乃囁嚅而言曰是吾母所未食者不忍先嘗也歸必備以奉母海性仁厚尙任恤遇族里婚喪事莫舉輒資助之人或以善施稱海遜謝曰母命耳非我意也其善則歸親有如是母年九十卒海時六十有八哀毀逾恒居廬不茹葷酒每食必先揮淚以祭二年餘因毀成疾守制未終而歿

陳鐸 字振聲城北騰鰲堡人少貧有至性父早歿常以未得終養爲憾奉母孝諸事稟承而後行有某商號聘充執事以母嫌遠離辭不就精卜術問者踵至以母有言終一錢不取居家崇儉獨奉母甚豐一日兒婦向鐸索被服擬爲澣濯遲久不應再請則曰已典質爲吾母供食品矣勿對人言更勿對吾母言蓋恐傷母心也鐸一子年未三十卒時母年逾八旬痛甚鐸爲婉諭曲解又頻於母前弄幼孫以悅之母病躬親服事目不交睫者數旬及歿哀毀骨立行廬墓禮屋小如斗孤燈風雨獨對寒邱鐸謂此中歲月不可多得聞者感泣



李紹均 字海岩邑東南海龍川人生有至性九歲爲季父元朗後事嗣母恪敬無違嗣母晚年病瘵紹均率妻岳氏服事勤謹廿餘年如一日母喪悲痛逾常每飯輒停箸啜泣有餽食品者嘆母不在終不忍食值令節感愴尤甚如是者三年以毀卒生平廣交游慷慨尙義施濟甚多鄉人欠粟累千石病革時召子孫面焚其券不令再索卒年六十有二

宛粹中 邑北名甲山人少孤業商中歲以母年高不忍遠離在騰鎮合資開設源升慶商號在櫃執事距家五里許日必歸省冒嚴寒酷暑而不渝居家日常依母夜必俟母安眠始歸寢如外出必告母以所往返必詳述所爲母病時侍左右衣不解帶者數月疾革深以未能治愈爲憾葬後行廬墓禮每值風雷雨雪恐親魂魄弗寧輒對墓流涕如是者三年邑紳重其行公舉孝廉方正部議以商人於廉字欠合駁之邑人不平明經董琪樹爲撰廬墓文以彰之

陳日新 字德三陳鐸之孫性孝有乃祖風八歲失怙母張氏撫育成立年十六習商每念母半生罄居備嘗辛苦心輒傷之故奉母善承其志無絲毫違母晚年病不能起日新侍疾飲食湯藥不輕假手他人母臥牀數月日新未嘗一夕安枕母歿哀泣至痛人不忍聞又以祖父孝行母氏苦節未獲褒獎時歎於懷及長子興亞官京師諭令乞同鄉官代爲陳請蒙大總統頒賜匾額祖曰庸行克敦母曰冰霜勵節至是日新心始慰

劉守中 字履庭邑西牛莊人附生幼失恃繼母遇之虐後自生二子益憎守中峻其父殺之二子竊聞陰告兄守中恐見殺貽父母過遂潛逃父悔乃歸父卒二弟並殤繼母依守中以居孝敬不違終身不言繼母謀殺事平生尙氣節重廉隅甲午變亂友某居日本軍政署謂守中曰日人需才孔急吾導子必見用饒富可立致也守中堅謝不往以貧約終

韓志翰 字翼臣城南鄧家臺人武庠生兄志古異母弟志尙素相友愛父卒後家議析爨



時弟年十三繼母以孀孤度日大難母子相對泣志翰見之愀然遂承繼母意與弟同居門內事聽繼母命無少違弟讀書不成使習武應試弟性強每欲技出人上志翰恐用力過猛有傷恒監視規戒之卒教弟入武庠志翰孝繼母友季弟始終無間人皆稱之又敦族誼從姪光泮鰥無子族姪光增光遠等貧莫能婚皆助資俾成室以延後嗣宣統元年年八十蒙賜恩榮耆老並頒齒德同尊匾額是年冬卒戚友贈一鄉善士匾額

韓志尙 字芹圃鄧家臺人後移居城內武庠生少孤事母孝母逾七旬病癡且啞神智日昏始於飲食衣服尙能示以意久則饑飽寒煖皆弗知志尙視聽入微常先意得之與母同處一室歷十餘年注意起居不少懈母因服事善享壽八十七志尙家素封善權子母性儉獨於善舉不吝民國四年河西大水災狀甚慘慨捐奉洋千圓經段香巖將軍獎給惠及桑梓匾額年六十卒

車玉成 字瑞峯城東南關人性孝七歲時母患目疾聞呻吟輒啜泣聞祈禱靈信之朝夕祝告母疾果痊少習商充副執事旋以父病辭歸侍湯藥勞瘁數月而父卒哀毀甚泣血不能成聲弔者感嘆事母善養志在城內經商雖百忙日必還家省母歷久無間妻子氏亦有孝行玉成平生多善舉光緒戊子大水携資赴河北購糧見災區慘狀遂傾資以助曾在本城任某商號執事嗣因連號賠累業並停玉成出資重理舊業仍與任某合作爲備欸而不取息人咸義之年七十卒里人贈以德孚桑梓匾額

常振聲 字赫廷城南三道溝人廩膳生性孝幼失怙事母善能養志母半生茹素飲食喜清潔每具殺饌振聲恐家人不慎必親自經手投母所嗜調劑適宜然後捧盤以進母在不忍遠離於村中設帳招集士子課以帖括愛才若渴遇寒峻恒教之不取脩脯晚歲進德日篤其言行爲人所欽佩年六十卒



洪積善 字一元城西秦家堡子人天性篤厚奉親克孝父母歿庶母尙存愛敬一如己母庶母貌莊重終日高堂危坐積善夫婦惕息侍旁親友到門覲拜咸知子能孝母不知母之爲庶而子非所出也質魯嗜學尙道義慎言行逐日寫日記以自課又親敬賢士遇困乏時輒賙恤之晚歲爲友負債甚鉅至鬻田數百畝代償終無怨言士紳重其人爲送忠厚傳家匾額年七十三卒

宋爾公 字槐三城西四台子人父懋官爲邑名士爾公少承庭訓有學行質直重義有異母弟三早析居仲弟藻銓宦游閩省病歿遺孤作賓甫六齡季弟爾壽業商中年卒遺孤世榮世臣均幼家皆式微兩嫠撫孤不易爾公善視之親訓諸姪俾作賓讀書成優貢世榮世臣成立習商業兩嫠皆以節著爾公天性真摯於分內庸行務盡其心之所安而世俗每驚以爲奇嘖嘖稱贊卒年七十無嗣以姪世榮承祧

海城縣志

卷五 人物 孝義

十九

戚善卿 字閣臣居城內孝廉方正士升孫也性渾厚敦孝友讀書務求實踐不喜詞章之學業師王冠廷先生深器之少失怙恃事祖父母繼母皆以孝稱處昆弟友愛尤篤從弟澍卿性豪華喜交遊已耗家資殆半自儲二千金復被耗罄毫無怨色始終輯睦光緒戊子大水族人多居遼河西被災甚酷急貸巨款救之全活數十家後無力償還者悉焚其券族人德之甲午亂後由國史館謄錄議叙州同時李中丞秉衡撫魯因有世誼函邀而往欲有展布到省未逾月而卒年四十有六子慶譽（一名鴻藻）亦業儒

李布瀛 字輝如牛莊北關人文庠生天性篤厚事親孝內外無間言遇兄弟友愛終身不渝容止莊重見者皆敬之

穆維辰 字紫垣居邑西秦家堡子寒士也平生重孝義父母逝後每值生忌兩辰必具麥飯挈殺榼覲墓含涕以祭見者感歎居室蕭條薪米不給處之泰然設童子帳以弟子規朱



子小學教誡後生酷嗜宋明性理諸書又熟讀史鑑與友談歷代節義事娓娓忘倦更闌燭  
跋猶不止寄懷高尚於世俗浮榮漠視之年七十卒

任韶年 字鳳喈邑東南石柱溝人幼孤事母有孝行又篤友誼有單昭棣者山左寒士落  
魄走關東韶年一見傾心結爲兄弟裘馬與共者五十年昭棣亦義烈甲午之役韶年以嫌  
疑被日兵逮昭棣不避艱險請以身代備受箠楚卒得免與韶年同歸宣統三年昭棣卒韶  
年如喪手足以禮葬之清末鄉會成立韶年被舉爲鄉正尋充第二鎮董事會總董遇紛爭  
事和平排解人皆悅服年五十八卒

張 汾 字修源城東南三角山人業儒性剛不畏強禦獨敬兄至老不衰兄浚中年與析  
箸田產聽兄自取不與校晚歲鬢髮斑白兄不怡輒呵譴順受無違再甚流涕而已卒年六  
十有三

洪永侯 城西北秦家堡子人幼貧務農未讀書兄永振卒遺子二艱窘無以自存嫂擬改  
醮永侯大戚力勸守節撫孤已以事畜自任在外傭工廿餘年所得資盡供嫂姪用後嫂以  
節終二姪成立家漸小康永侯年逾耄齡猶康健里人談其事咸歎服

于步瀛 字致遠城東北文洞溝人附貢生性篤厚重義輕財無兄弟有從兄弟二按先人  
遺產步瀛應得其半析居時竟與從兄弟三人均分其讓德爲時所稱

王化行 字子良縣學附生孝廉耆齡長子性抗爽幼承庭訓兢兢以繩墨自守孝廉捐款  
修橋並辦義倉義學等盛舉化行盡力頗多先卒無子繼弟子明善爲嗣

康汝驥 字洗凡邑北泥溝鋪人性誠篤尙友恭昆季二人兄汝驥一子紹安甫七歲汝驥  
病危囑之曰以此一塊肉委弟矣言畢而歿家無恒產歲租地數十畝令子耕供姪讀書人  
問之曰薄子厚姪何也答曰子愚則耕姪慧則讀非有厚薄也後姪學成而卒嫂尙在汝驥



設帳課徒家事一委寡嫂不置問年六十無疾而卒

海城縣志

卷五 人物 孝義



慈善

清

律洪鈞 城西北大富甲屯人雄於財樂善好施咸豐九年仿常平遺制創立義倉以備荒歉又仿堅壁清野法於村之四周修築土圍以防盜賊同治五年馬賊劉老好入境各鄉多罹害獨大富甲屯賴土圍力安堵如常

劉萬善 城西北大莫七屯人性孝友喜慈善以商業致富貲雄一方遇戚里困乏恒出資調恤之咸豐末歲大饑村鄰饑民甚夥萬善惻然憫之於里中設粥場以食餓者嗣後荒歉必出資助賑家開梁店並平糶以抑市價地方陰受其福久之遠近銜感皆以劉善人呼之年七十一卒里人特贈孝弟師表匾額

劉振唐 字摺卿萬善子也附貢生官盛京刑部主事十餘年以廉能稱居家奉親有孝行一姊早孀敬恭備至處戚族鄉里多慈惠有父風同治間遭水災嗷鴻遍野振唐自立粥場以食飢民每歲歉除賑濟外並將所儲粟減價出售遇極貧恒不取資鄉人嘖嘖稱善一身品行方正戚友爲贈言行可法匾額年六十二卒

王宗誠 邑西岳家屯人性仁厚篤孝友居鄉善行綦多每值歲除族有貧窶無措者悉資助之同治五年馬賊劉老好等破牛莊四八受其蹂躪民食缺乏里中舉火者五六十家宗誠憫之備欸赴遠地購小米數十石按戶調恤貧戶因以免飢每遇凶歲於貧戶均給糧接濟鄉人至今德之

李維垣 字慎菴城內人少孤貧弱冠習商營川充寶元興商號執事廿餘載小有積蓄以母老辭歸竭力奉養內外稱孝無間言性慈尙任恤遇戚里困乏輒資助之常刷印古今格言以勸世人晚年以次子秉善在軍有功保同知誥封通議大夫民國六年蒙大總統褒以



德幼年高匾額年八十七卒瀕危囑子立義塾以教貧家子弟捐奉小洋五千元存儲生息以作常年經費語畢而歿

李廷銓 字星裔居城內業儒豐於財在故里西丁甲峪設義塾捐助學田學舍價值萬餘金旋病故田房均出典經妻孔氏籌資贖回交管理員經理管監督鳳齋嘉其義改塾名星裔小學堂並爲請獎蒙給序流芳匾額孔氏能成夫志給好義急公匾額

周寬 城東老爺廟溝人家貧性善好道本村老爺嶺爲來往要途以峻嶺崎嶇車行不易過者苦之寬不惜筋力剗峻嶇除坎坷勞一生卒將嶺道修平行人感激咸呼寬爲周善人晚年辟穀導引無疾而終

楊澤遠 邑西牛莊人性嚴正心慈善家道殷實每屆春初鄉民無力耕種者澤遠輒假以資秋後償還不取利息其他善舉甚多人皆以楊善人稱之

海城縣志

卷五 人物 慈善

二十三

徐百順 字天存城北梧樹屯人狀貌偉岸性和厚多善行光緒十五年購南長嶺子蘇發魁地三段計數畝作爲義地今四十餘年荒塚纍纍過者輒指道之光緒二十年經鄉民贈樂善不倦匾額年八十一卒

劉積厚 城東南三角山人善理財性儉獨遇善舉不吝縣境老爺廟八里河炒鐵河營城子等村均臨河向無橋梁秋冬之交車行困難積厚每冬爲搭草橋歷十餘年不輟缸窰嶺村西之嶺極險阻常軋車夫多慘死積厚自出資修平之過者稱便甲午之役湘軍在牛莊與日軍血戰陣亡者甚多積厚以忠魂可憫出資作道場以超度之又爲本城宣講堂善主逐年施財物焉



方伎

清

王國生 字恩皇城東倉屯人康熙庚子科武舉好數學於數理精蘊及宣城梅定九算書精研有得張士毅明府創修文廟特邀預估工料剖晰精當委監工主會計收支數錙銖不紊張明府益重之題額旌其門

矯晨禧 字子陽號四大山人又號卓卓子原籍山東黃縣曾祖鈞璧刑科給事中祖玉聖拔貢生始遷縣境父一桂業儒晨禧少孤事母孝初習帖括既而厭棄之專務高遠神奇之術凡天文地理及醫卜星相諸書無不窺其奧秘尤邃於易受數理於戚允菴先生術益精平生特立獨行與世不苟合遂以下隱於市推測多奇中日得千錢足自給即閉肆下簾陶然以讀書自樂有嚴君平風年六十五卒著術學書甚多經兵燹遺稿散失僅存奇門括囊集食墨錄鴻法衍象樞及青囊錦囊等篇待刊

李玄真 邑北將軍屯人性聰慧有異才從江南某術士受形家秘訣並卜筮針灸諸術決疑多奇中遇疾施砭隨手奏效人稱其術入神云

姜樂園 城北甘泉舖人初業儒後嫻堪輿卜筮諸術爲吾邑術學名家

戚榮卿 字襄廷城內人孝廉方正士升孫也業儒氣和藹多雅量從大父習醫術尤精女科施方濟人多神效乞方者踵相接雖百忙必從容詳審以應之家備丹藥曰九釐散以救損傷不取資年六十七卒

劉守誠 字希明牛莊人附生少負才名受知於邑侯張芷生屢試棘闈不第遂隱於醫遠宗靈素近法長沙立方不拘湯頭隨症加減多奇效一時醫林有聲懸壺三十餘年活人無

算



魏正銘 字丹書邑西趙垓灣人有學行精醫術上自羲皇下逮歷朝醫學名家諸書無不窺其要秘而別有會心一時名甚噪有國手之稱不輕筮古方所需藥材必購選精良寧費重資不以劣藥誤人病家信仰攀請踵至久之積欠藥資者數甚巨一日舉焚其簿籍不再索其行事慨爽多類此牛莊旗署欽正銘品藝折節迎聘因常往診脉立方外語不及私年逾七旬尙健旺一日忽命子購木料督工造棺談笑自若棺成無疾而終子三幼承庭訓均業儒

徐象坤 字厚菴牛莊人幼讀書甚聰慧因貧輟學改習岐黃術與名醫張衍澤善研究醫理疑難互詰必洞達乃已復潛心體驗久之認症不謬時稱國手同治元年大疫死亡枕藉象坤皇皇奔救全活甚多又重友誼膠西傅炳甲蓬萊趙暉吉(均善書)常主其家後炳甲病歿爲治喪葬年六十七卒著有醫學正傳十卷加減湯頭歌二卷寶氣論一卷均未梓行

海城縣志

卷五 人物 方伎

二十五

張衍澤 字子厚本城人少從慈谿郎椿翼習醫術尊仲景論說又旁採羣書以引申之繩幽鑿險妙悟天開遂成醫學名家又重醫德遇貧窶恒施方藥某歲營川大疫奔走施救全活甚多積勞致疾卒初友人張某負債數萬縉力不能償衍澤得其情焚其券人皆義之子三庭素庭樞庭樸均紹父業有聲

張廷樞 字一清邑南老古林子人父兄俱以醫名廷樞習醫得家傳精針灸術遇症按穴臆之奏效極速人譽之爲八法神針甲辰日俄之戰死於亂人多惜之

路克遵 城內人世業醫尤長鍼灸術凡中風等症臆之立效弟克循與兄齊名小兒科尤多經驗歷年施引牛痘不取一錢小兒天花阨關獲免甚多兄弟俱有孝行父歿思念綦切後年餘有關內賣花翁某至門具言其父在某處懸壺託寄一信啓視字跡宛然述年貌悉符因大痛擬即往尋經姑丈戚允菴力阻之以爲鬼神難憑往必無益始不果行



盧德升 字恩如城南小河人性樸誠少貧讀書無多偶得秘方有神悟試療疔疽等症輒效喜東醫寶鑑一書深研精求加以經驗証以他書遂成外科專家又有醫德凡病家叩請無遐邇蚤暮必立往藥價從廉雖富室不多取晚歲家類素封年逾八十卒子二廷山廷海均幼爛父術醫名大噪有小河盧家之稱孫十四人皆懸壺紹祖業

黃麟閣 以字行城內人累世業醫精小兒痘疹科遇危症一施刀圭立奏奇效子有聲孫家誥俱以痘疹科有名於時

曲江 城內人性剛直少貧從醫士黃麟閣學岐黃術尤精痘疹科有名於時

楊喜霖 字雨亭城南土臺子人讀書能文久困場屋中年改習醫術於溫病傷寒極有心得著有藥性歌括溫病論諸書未付梓遺稿散失

顧長齡 字杏村住城南關幼習醫術擅長婦女科性謹慎驗症詳細不輕用猛烈藥嘗言

海城縣志

卷五 人物 方伎

二十六

治病當培養元氣正氣足則外邪自退凡施治多應手奏效從之學醫者如姜文川劉光大其最著者也年七十餘卒子壽昌紹父業

張聖功 字魁一城內人父爲邑諸生聖功幼習醫術擅長兒科於小兒雜症體驗入微嘗謂小兒病因不外食火兩端診視稍疎易致錯誤不可不慎又尙醫德一時士林慕其爲人多與論交年逾七十卒

朱寶瑚 城內人幼習繪事又喜讀醫書研究十餘年有心得遂業醫於傷寒溫病辦晰入微治療多效無子以姪同文嗣繼父業爲時良醫

周質亭 以字行蓋家屯人舉人周僖周儒兄也性高雅好讀書屢試芹宮未售精繪事尤工米家山水得其墨迹皆什襲珍之

王伯瞻 原籍山東流寓本境父耀堂善唐隸伯瞻得家傳又工漢隸並諳繪事敏妙天成



所畫螃蟹筆力遒勁張蟹運爪精神欲活見者愛之

毛允齋 城北耿莊子人生而聰穎酷嗜繪事因得雲林之秘最愛畫米家山水久之筆態蒼老得者寶之

王靖陽 字華洲號雲舫居城南大石橋爲人曠達善醫術尤精繪事妙筆天然所畫花鳥栩栩欲活牡丹尤佳時有王牡丹之稱年逾六旬始婚娶旋生子教養成立及生孫而靖陽始卒壽一百十四歲子某字少洲明醫解畫有父風

王聿修 字梅村邑人性慧精繪畫下筆神妙所作米家山水濃淡有致名與毛允齋相伯仲時並稱之

姜保元 邑人善畫丹青所繪柳燕舞熊翩翩宛然神肖寫生妙筆爲一時之冠

李希尹 字欣園城南張家園子人業儒性風雅善畫山水桐林有名於時

海城縣志

卷五 人物 方伎

二十七

張梅村 以字行城內人性高雅喜詩愛書畫視世俗浮榮淡如也某歲客營川居鄰書舍又近娼寮自撰門聯云愛彼書聲來舍北任他春色滿牆東某南人見之極歎賞造其廬訂文字交年逾九旬卒



流寓

漢

王仲 鄆邪人好道術明天文諸呂作亂齊哀王襄謀舉兵討之嘗數問於仲及濟北王與居反欲劫仲爲將仲懼禍及乃浮海東奔隱於樂浪山中七世孫閔八世孫景皆以人物稱

東漢

王烈 字彥方平原人舉孝廉以義行稱鄉里有盜牛者主得之盜曰刑戮自甘乞勿使王彥方知也烈聞之使遺布一端後有老父遺劍於路一人見而守之老父還尋得劍怪而問其姓名以告烈乃盜牛者也其以德感人如此董卓之亂避地遼東躬秉農器布衣蔬食不改其樂本境之人奉之若君太守公孫度接以昆弟之禮欲屈爲官烈乃爲商賈以自穢

海城縣志

卷五 人物 流寓

二十八

得免後曹操聞烈名徵之終不至建安二十四年卒於遼東年七十八

管寧 字幼安朱虛人漢末黃巾賊起與邴原王烈避地遼東公孫度虛館以候之寧見度語惟經典不及世事退居山谷中越海避難者依之旬日成邑（在縣城北五十里新台子）遂講詩書明禮讓非學者不見由是度安其賢民樂其德寧所居村落汲者男女雜沓或爭井相鬪寧置器井旁以待之鄰有牛踐甯田甯爲牽牛著涼處自爲具生芻以飼之牛主大慚若犯嚴刑由是禮讓行於海表魏主丕受禪即位徵甯還是時公孫度死嫡子不立而立弟恭甯曰廢嫡立庶人有異心亂之所由起也乃將家屬浮海歸初甯在遼東公孫氏所餽皆受而藏焉及西渡盡封還之歸後屢徵不起年八十四卒

邴原 字根矩少與管甯同里並以操尙著稱黃巾賊起原將家屬浮海遂至遼東同郡劉政有勇略公孫度欲殺之盡捕其家原以政付太史慈使歸旣而謂度曰將軍前欲殺劉



政以其爲己害也今政已去君之害除矣不若並放其家無重怨也度乃赦之原又資送還郡原居遼一年歸原者數百家教授之聲不絕原性剛直嘗以清議格物公孫度以下皆不安管寧曰潛龍以不見成德言非其時皆招禍之道密遣原西還原行數日度甫覺嘆曰邴君所謂雲中白鶴非鶡鷄之網所能羅矣

太史慈 字子義黃縣人猿臂善射少好學仕郡爲奏朝史爲讐家所忌恐受禍避之遼東依管寧邴原以居孔融聞其名因數饋其母後融爲黃巾管亥困於都昌慈適從遼東歸從母命至東昌復突圍至平原說先主出兵破賊都昌圍解

國淵 字子尼樂安人師事鄭康成篤學好古與管寧邴原等同避難遼東講學山中人多推崇之

清

海城縣志

卷五

人物

流寓

二十九

傅炳甲 字象九原籍山東膠西流寓海城性曠達善書法筆力雄健又耽於酒醉後神到走筆如游龍半生落魄江湖知音甚少晚年寓牛莊徐象坤醫士見其字驚爲名家因訂交炳甲胸襟瀟灑除樂聖作書外不知天壤更有何事年逾七旬卒於象坤家身後書名益噪得者寶之

魯蘭亭 佚其名山東某縣諸生有雋才落拓不羈工帖括別透玲瓏有目共賞富於經史子集光緒初年在本城設帳引掖後生得力甚速至今人猶稱之

章楨 字西庚河南祥符舉人光緒二十四年從縣令米穰蒞海兼主講他山書院待學子以誠時未變法即倡新學所蓄書種類甚多度置書院勸諸生瀏覽當日人多忽之楨去後新學風氣漸開始服其確有先見非腐學比也



列女

賢母

明

程氏 本衛千戶李通妻通世襲本衛千戶生子芳甫三歲通卒氏安貧守節撫芳成立襲千戶職後戍邊戰死芳妻陳氏年少守志奉姑通弟正與文皆早亡正妻宋氏文妻陳氏俱守志不移一門四節彤管流芳

清

詹氏 邑南金家牌房金得彥妻年十九于歸二十四夫卒長子利登甫周歲越兩月遺腹次子利科生翁姑均年逾六旬氏事奉維謹撫孤成立次子利科官至防守尉嘉慶十一年奉旨旌表建坊村外

海城縣志

卷五 人物 列女

三十

陳氏 邑東南大新屯尙玉秘繼室蓋平紫芳屯陳氏女中年而孀家貧甚遺孤維瀚尙幼氏苦志撫孤以紡績佐兒讀書維瀚弱冠遊泮有聞於時善治家積資置田四百餘畝維瀚有前母兄三早析居氏憫其貧命各給田百畝以贍之氏壽享大年孫曾林立至今成巨族

魏氏 邑西南祥水泡王廷升妻舉人耆齡母也性端莊明禮義年二十三而孀子耆齡生甫六月家無中產茹苦撫孤子七歲即使就傅縮食節衣以供修脯十餘年微產殆罄間紡以績佐之卒教子登賢書學粹品端爲士林泰斗一時鞠子者咸以氏爲法邑紳上其事蒙旌表如例年七十三卒

郭氏 邑西四台子恩貢生宋藻銓妻武庠生郭某第三女賢淑曉大義中年夫宦遊閩省病故子作賓甫四齡家中落茹藥撫孤作賓八歲時力不能延師商請夫兄槐三歸里設帳以便子就讀及入塾每歸必問所學夜於燈前使溫習氏縫紉佐之書聲琅琅約一時許始



命就寢作賓年十七出試有聲而氏遽卒臨歿以未及見子成名爲恨後作賓以優貢考職授鹽經歷孫德謙高等師範畢業

民國

李氏 邑西北金家灣子汲魁妻處士李熙春女性淑慎年二十于歸時姑年逾七旬氏侍奉維謹內外稱孝無間言二十九歲夫故子二長寶純甫四齡次金純尙在襁褓家貧茹苦撫孤寶純長能理家金純弱冠從戎以勇略著官至二十八師師長遷熱河都統民國五年邑紳爲請褒揚蒙大總統頒賜匾額以旌其閭

姜氏 邑西牛莊欒玉書繼室同邑姜萬禎長女子歸時前室遺子駿聲甫五齡夫懋遷於外持家教子悉氏任之中歲夫歿臨危指子告氏曰此子汝所愛宜善撫之儲爲國器以亢欒氏宗氏謹識夫言備歷辛苦卒訓子成進士由刑部主事歷官至吉林高等審判廳長氏

海城縣志

卷五 人物 烈女

三十一

誥封一品夫人年六十一卒蒙大總統頒賜表德來裔匾額

王氏 牛莊歲貢生李際昌妻同邑王弼之女子歸後善事翁姑鄰里稱孝夫故遺子三俱幼氏朝夕訓誨量材各授以職業長子心曾讀書成名由附貢歷任岫巖法庫等縣知事擢陞熱河道尹孫紹華肄業北京國立大學同鄉京官爲請褒揚蒙大總統頒賜令德孔昭匾額

張氏 邑北騰鰲堡陳連茹妻四方台張起緒女十七歲于歸翁鐸性孝氏承翁意善事祖姑翁商於外夫往尋未及歸而姑歿氏爲質釵裙以治喪葬夫歸未幾卒氏年三十祖姑老翁衰子幼家貧賴氏編髮爲鬢鬻以糊口無何祖姑歿翁苦塊昏迷氏爲營喪葬盡禮翁歿亦如之撫二子成立長子日新性孝以家貧欲令長孫興亞習商節學費以養親氏不許卒教興亞讀書成名氏年七十四卒民國三年興亞以陸軍少將任京師憲兵司令官爲祖母



請褒揚蒙大總統頒賜冰霜勵節匾額

韓氏 邑東北梧樹屯李明春妻庚子拳匪之亂明春罹難死氏承夫志教子宗德就學由北洋陸軍學校畢業歷官至奉天陸軍第一師司令部副官長民國十一年氏年八十蒙大總統褒以慈孝揚麻匾額



節婦

清

段氏 邑人陳楓妻婺守三十五年鄉里重其節

章氏 邑人張仕妻夫亡無子繼姪以延宗祀教養兼至守節五十二年

白氏 邑人王際亨妻夫亡守節勤儉持家動必以禮肅然可範堅貞之操始終不二

林氏 邑人李之俊妻青年勵節歷盡冰霜以節壽終

王氏 邑人袁鳳瑞妻夫亡矢志不二荼苦備嘗冰操愈勵完節終身

王氏 邑人李希成妻早歲夫亡勵柏舟節邑人爲請旌表奉旨允准建坊入祀節孝祠

張氏 邑人李文炳妻青年夫故矢志守孀邑人重其節爲請旌表入祀節孝祠

趙氏 邑人鄭希禹妻年二十餘夫故苦節堅貞始終不二邑人爲請旌表入祀節孝祠

海城縣志

卷五 人物 烈女

三十二

李氏 邑人楊爾鉅妻青年而孀守志不移邑人爲請旌表入祀節孝祠

黃氏 邑北姚千戶屯林正宗妻嘉慶十年子歸生一子甫四歲夫故氏年二十二家貧自

甘清苦子稍長使就傅後充領催置產甚厚氏終不忘疇昔艱辛紡織不輟有魯敬姜風同

治元年邑紳爲請旌表年八十三卒

王氏 城內戚士銘妻年二十一于歸越五載士銘遠遊不歸氏矢志堅貞歷七十餘載九

十一歲卒以從姪元桐兼祧邑紳爲請旌表奉旨建坊入祀節孝祠

王氏 城內戚士祿妻年十七于歸越十載夫卒只遺一女繼姪元椿爲嗣姑李氏家法嚴

遇事不寬假氏承顏順志孝敬無違歷五十餘年始終不渝卒年八十一邑紳爲請旌表如

例

曲氏 城內太學生戚元桐繼室同邑曲寶山長女性孝而慈于歸後事翁姑如父母撫前



子如已出年二十九夫故養親教子皆氏一身任之後十年翁姑歿女嫁而亡無何前子又故遺孫鴻藻尙幼家中落賴氏苦志經營克復先業光緒戊子大水族人居河西者罹災甚慘氏爲鬻簪珥以濟之年六十九卒清時已蒙旌表民國八年又蒙大總統褒題志潔行芳匾額

張氏 城內戚元椿妻邑北山水圪張大馨女年二十一于歸夫病瘖啞不能言氏服事維謹起居飲食嘗先意得之越十年夫歿孀姑在堂三子俱幼事畜悉在氏身未幾次子殤三子出繼長子榮卿報捐同知遊京師求同鄉官爲請旌表奉旨允准建坊並頒賜清標彤管匾額

戚氏 邑西四台子王乃祐妻父士升孝廉方正翁汝翰拔貢生氏于歸翁姑已歿事夫叔父如母翁姑處諸娣姒以禮二十九歲夫亡遺子四俱幼茹藥撫孤年六十六以苦節終邑海城縣志 卷五 人物 烈女 三十四 紳爲請旌表如例

馮氏 邑西小碼頭孫起達妻韓屯子馮元德女性端謹不苟言笑二十五歲舉一子紹宗未彌月而夫卒矢柏舟志奉姑虔謹撫孤尤具苦心幼時恐殤陰以鴿自隨設不幸即與兒同命卒教子學成名立守節五十餘年七十七歲卒生前已蒙旌表如例

楊氏 牛莊舉人王麟書妻處士楊天培女新婚未百日夫故氏讀書明大義決志殉夫翁泣曰汝殉夫固義獨不念余老夫婦耶何如替夫事親尤爲合義氏聞言頓悟強起作未亡人服事翁姑曲盡孝道姑卒旋遭繼姑之變憂鬱致疾卒春秋四十

曹氏 牛莊趙朗軒繼室沙河沿曹文學女也二十七歲夫故翁姑已老前室子女均幼生子正昌甫三齡事畜悉氏自任甲午之亂滿城驚避值翁姑病不能起氏趣子媳遠避已獨留守明年正月翁歿家無一人經萬難始得入殮權厝及日軍入姑病又危氏易男裝懷利



刃冒險以捍衛之姑歿時將炎熱日軍促出柩否則焚燬氏哀呼奔走感動鄰里得雙棺並舉以葬宣統二年族長爲請旌表民國復蒙大總統頒賜匾額

鍾氏 邑西缸皮嶺趙慶瀾妻年十七于歸初婚值舅喪慶瀾哀毀家事一委氏居四載夫卒越數日遺腹子汝梅生族人覬覦遺產時謀不利於孺子氏百計維護子始成人家亦得保姑故羸病賴氏賢而才無門戶憂姑得從容頤養至七十九卒辛亥歲盜入室大掠氏被創殞命汝梅創尤巨竟不死偵得盜名悉捕置諸法大仇以復遂爲母請旌表如例

陳氏 邑西頭台子趙德陞妻同邑陳萬有女幼嫻閨訓年十九嬪於趙逾十載夫卒翁姑年老子裕成甫二歲事畜皆氏任之守節歷三十年宣統三年邑紳爲請旌表如例

李氏 牛莊雙當舖范澤貴妻蕭姬廟李氏女年十七適范事翁姑以孝聞翁姑歿後庶姑某氏年少有意改醮故肆凌虐以難之氏事奉愈恭致庶姑無隙言去卒全節以歿氏守孀

海城縣志

卷五 人物 烈女

三十五

時家式微子一女五均幼皆撫育成立晚景小康享年八十無疾而終

孫氏 牛莊王璽榮妻父廣成居官草溝年二十一夫卒一子秀實甫四月撫孤守義志不少淪氏精明能助翁理生業家以饒裕諸夫弟長意見齟齬賴氏和解一門輯睦晚歲多病力不能支乃析居產任諸夫弟分配不與校常以自強訓子後子學有成氏年五十一卒

齊氏 牛莊馬甲石常發之妻唐氏與馬甲石常祿之妻齊氏均少年守節奉旨旌表同建一坊於六通橋畔

高氏 牛莊王壽宸妻年二十二守節無子繼夫弟壬林子爲嗣貞操苦節二十餘年卒年五十

王氏 牛莊洪廣德妻青年而孀守節不二同治元年旌表建坊牛莊東大橋北

白氏 邑西紅草泡王朝相妻牛莊白玉潔女知縣雲達妹也幼嫻禮教年十七歸二十二



歲夫故無出冰霜苦節五十餘年光緒二十九年旌表建坊六通橋畔

吳氏 牛莊劉裕辰妻同邑吳殿桂女年甫三十夫故無子有女三矢志守孀始終不渝光緒二十五年旌表建坊六通橋畔

王氏 城內張振德繼妻母家荒嶺子年二十四于歸三十夫故無子繼姪際清爲嗣後與夫兄析居家益不支僅恃十指度日尙令子就學子年二十六又卒婦劉氏有孝行勵志守義與姑同王氏已請旌表劉氏尙未褒揚

趙氏 城內張維清妻青台子趙姓女也事姑以孝聞中年夫歿無子繼從姪家棟爲嗣甲午之役奉姑避亂東山流離顛沛孝敬如常亂後財物損失殆盡不能自存賴針黹養姑姑老患風疾艱於步履氏服侍十餘年始終不懈先姑一年卒彌留時猶以事姑未終爲憾云

常氏 邑西關沙河沿張桂生妻牛莊常聯魁女生而貞靜年十七于歸夫嗜學新婚未匝月即赴塾肄業因勞心咯血未幾卒氏無子痛哭絕食父勸曰人不遇盤錯不見風操宜立節爲兩家光何輕生爲氏遵父訓強起治喪遂屏棄鉛華庭戶不出繼姪某爲嗣苦節堅貞逾六十年鄉里稱之

金氏 邑西關沙河沿關德昌妻于歸後舉一子允升年猶孩提而夫逝世氏茹藥撫孤教子成立入邑庠某科北闈鄉試歿京邸遺一孫尙幼氏率媳鞠孫艱苦度日歷四十餘年邑紳呈請旌表建坊村外

黃氏 邑西何沙河沿曹廣全妻小干戈屯黃元福女幼失恃年十二歸養於曹十五作婦連生五子值歲荒夫卒積債甚多氏傾產抵還寧自貧無悔里有富人喪偶知其賢託媒諷之氏拒曰未亡人命薄甘自苦也請勿復言日啖糟糠卒撫養五子成立後三子永惠營商家致饒裕氏年九十餘無疾而終



李氏 邑西郭家台吳寶田妻到門未久夫卒立志守孀食貧無怨歷五十餘年無子繼族姪某爲嗣未請旌表

徐氏 邑東南老爺廟八里河李明繼室母家徐家園子性强毅精女紅既歸生女一男二夫涉沙河被溺氏年二十七家貧只瓦房五間與夫從兄某各分其半某利氏改醮乘歸寧將屋折賣裝載將行氏聞信歸臥車轍以死爭始留其半某料氏寡弱室難再搆氏竟興工晝赴里率幼女運土夜歸宿母家日往返四十里積勞年餘卒構成茅屋三楹其毅力堅貞人咸壯之撫二子成立娶媳生孫年八十餘卒氏女生有烈性針黹精敏類母適山後呂姓生一子年二十三夫故撫孤守義有伯姬不下堂階之風踰數載因入以改醮諷示女曰此語胡爲來哉竟忿激致疾而歿氏次子宗印婦徐氏性貞靜母家桑樹溝年二十六居孀一子鴻訓甫三歲以家微辛苦備嘗守節五十餘年卒

海城縣志

卷五 人物 烈女

三十七

趙氏 邑南腰屯唐連恩妻老爺廟八里河趙氏女性穎敏解算數年二十一適唐踰年舉一子遂守孀家貧舅姑在堂事奉克孝後舅姑歿女又于歸只氏一身冷雨孤燈紡績不輟貞操歷四十餘年始終不二六十五歲卒繼從姪洪志爲嗣

劉氏 邑東南三角山處士姜萬侯繼妻父丁甲業儒幼承庭訓端默寡言年二十七于歸生一子文川夫故酷貧無依矢志撫孤教子讀書六載以貧故改習醫術氏年八十卒苦節歷五十年邑紳爲請旌建坊入祀節孝祠

張氏 三角山周宗滿妻父連旺居牌樓屯家貧以女爲周氏養媳時年十二因熟肉亡失姑疑氏竊啖氏覺之無以自白遂茹素奉佛以明志年未三十夫客死遺一子繼殤貧無依傭工自給或諷以孤寒至此爲誰苦守志終不移年六十三卒於營川劉孝廉家孝廉憫其苦節爲具棺湯葬義地



曹氏 邑東南牌樓屯張朝柱妻母家析木城于歸後生一盲女家貧甚朝柱患咯血瀕危從兄文智昇至家氏率女從之逾四日夫卒葬後氏居文智家毫無二志年六十一以節終

金氏 邑南廟兒溝賈信之妻母家小碼頭年三十守孀奉翁姑克孝遺二子長世魁八歲次世顯六歲撫養成立苦節五十一年已旌表建坊梨樹溝路側

劉氏 邑南趙家堡趙大紳妻父廣發居牌樓屯大紳嗜賭博有地十餘畝輸於博徒逼寫契紙而去氏拚命與爭卒返其田未幾夫故遺一女尋天氏年將三十矢志守孀以姪某兼祧繼一孫爲嗣至死保存先產

葛氏 邑南石咀子李賀妻葛天民女二十一歲夫卒無子老姑尙存家寒微藉鍼黹養姑繼姪某爲嗣苦節五十餘年

宋氏 邑南佛爺溝劉克勤妻宋天喜女二十四歲守孀一子在抱翁姑俱歿夫有弟少不更事氏訓夫弟撫幼子辛苦萬狀後夫弟及子均成立壽逾八十以節終

張氏 邑東南石柱溝武秉政妻年十七歸武事姑孝道光十年九月夫故一女甫三歲四閱月遺腹子昭生撫以成立貞操歷三十年經邑紳爲請旌表如例

郭氏 邑東南海龍川李元朗妻八岔溝郭耀宗女也性淑慎嫻女誠年十八于歸二十九夫故勵柏舟節子女無出以夫兄子紹均爲嗣甫九齡氏愛如己出子長屢喪偶凡三娶各留子女賴氏教訓有法一門和睦氏年五十二時邑紳上其事奉旨旌表建坊於栗子園北大嶺年八十四卒入祀節孝祠

王氏 邑東樓房祝慶麟妻二十二歲而寡僅一女方在襁褓矢志守孀家貧翁遠商十數年不歸客死於外氏與娣丁氏奉孀姑不忘姑歿丁氏率諸子北徙氏孑然一身家無儋石而志終不渝叔翁祝華封明經嘉其節代請旌表建坊爲撰文以記之



馬氏 邑南廬家屯廬天申妻夫亡無子繼姪某爲嗣苦節四十餘年已請旌表

祁氏 邑南朱家屯朱洵妻趙井子祁氏女年十九夫故撫遺復子成人冰霜苦節幾五十年壽七十六卒

劉氏 邑南虎莊屯梁文明繼室少年居孀子二業成九成俱幼氏茹苦含辛撫孤成立長子業成先卒妻何氏生子正諱少亡正諱妻董氏守義以族子緒昌嗣一門苦節三世堅貞均經邑紳呈請旌表奉旨允准建坊並頒賜松節冰操匾額

胡氏 虎莊屯梁逢泰繼室於歸時逢泰正當染疾未及二旬而歿氏年二十二撫前室遺子克襄如親生貞操苦節四十餘年人咸賢之

秦氏 虎莊屯宋元禮妻年十八而孀勵志堅貞苦節五十餘年茹素奉佛苦志清修繼子某賴氏訓誨成立民國六年蒙大總統褒以節勵松筠匾額

海城縣志

卷五 人物 烈女

三十九

戴氏 邑西小費甲屯梁正諱妻大教習戴廣謨之女二十九歲守孀姑衰老二子毓秀毓芳俱幼仰事俯畜萃氏一身奉姑以終教子成立鄉里稱賢光緒十七年經邑紳請旌表建坊入祀節孝祠

賀氏 邑北小王屯賀某妻年十九于歸逾二年生子殿林夫故氏撫養孤子茹苦含辛三十餘年戚里咸稱之經邑紳爲請旌表如例

劉氏 城內丁萬聚妻大莫七屯劉清易女也性貞良寡言笑年十七于歸事祖姑孝能得歡心逾二年萬聚患疔毒暴殂氏絕粒三日誓以死殉夫姑勸以有遺腹宜善保全氏大悟復食至九月二十二日分娩問家人曰男乎答曰男也奈已死何氏曰吾無生矣遂嘔血數升而歿聞者驚嘆

劉氏 邑西北仙里村李春元妻大莫七屯劉萬善女性良淑嫺禮教年十八于歸事翁姑



孝生子來鳳來儀而夫故姑繼歿夫弟四均幼不更事氏待遇厚逾己子後夫弟及子皆成立戚里稱賢光緒三十三年卒壽八十有七

劉氏 邑西北大莫七屯焦復啟妻于歸八年夫故事翁姑撫幼女備嘗艱苦志不少移歷二十餘年族人爲請旌表如例

朱氏 邑西北大莫祁屯劉常順妻少年守孀家道僅資餬口翁姑歿子女俱無孑然一身守義八十餘年至百一十歲卒邑令爲請旌表蒙賜銀建坊並褒題匾額

屈氏 大莫祁屯亢萬來妻同里屈氏女也翁與夫父子俱寒儒氏無出年二十八夫故翁年老氏勤針黹以養禮敬不衰嘗曰人之所以異於禽獸者禮也家可貧禮不可墮聞者凜然翁歿後蘋蘩奉祀者四十年八旬餘卒至今里人猶稱乏

蔣氏 大莫祁屯甯樹棠妻大道八里河蔣姓女年二十三孀於甯夫有宿疾氏服事不懈

海·城·縣·志

卷五 人物 烈女

四十

逾三載夫亡遺女在襁褓氏心如鐵石孝翁姑撫幼女歷四十餘年邑紳爲請族表如例

張氏 邑西北秦家堡金發妻二十六歲孀居一子得印甫四歲撫養成立娶梁氏子二十六歲又亡媳改醮去遺孫四歲氏又撫養成立初家道甚微兩次撫孤歷六十餘年終致小康鄉紳洪積善嘉其節爲請旌表如例

項氏 邑東北張家堡子劉國平妻梧樹屯項氏女也二十歲孀居姑六旬子甫兩月忍死守義夫異母兄某早析居垂涎孤產迫令改醮氏泣請曰未亡人不從夫地下者以姑老子幼耳願終守以遂志某怒逼益甚不得已鳴於官某被懲而氏得奉姑以終撫子成立年七十二卒

李氏 邑東北駙馬營齊連明妻性貞靜年及笄于歸善事翁姑二十六歲夫卒子海甫四歲母子相依爲命貧苦度日晚歲積儲日厚類素封家年九十卒子孝守制未終卒



姚氏 邑北火石臺陳鴻仁妻咸豐八年于歸逾歲夫故氏年十九三越月遺腹子延豪生撫養成立六十三歲卒邑紳念氏守義四十餘年爲請旌表如例

閻氏 邑北姚千戶屯縣尚賓妻父士奇母蔡氏教女以賢淑于歸時姑尙在事奉孝謹年二十八夫亡無子守義養姑姑歿爲營喪葬一一如儀每逢春秋祭日必詣翁姑及夫墓展拜致奠見者哀之

張氏 姚千戶屯王成美妻年十八歸王二十五歲夫故子嵩山甫四月翁姑均老事畜悉賴氏一身後姑六十四卒翁八十二卒均經氏殯葬又爲兒授室家無田產晚歲以女紅積累資贖回先人田產數十畝生計見充

滿氏 邑北四方台解廷貴妻同邑滿氏之女二十六歲夫故子長福生甫五月家道寒微氏守志撫孤柏舟自矢無何翁姑相繼棄養氏爲喪葬盡禮教子成立致家小康鄉黨皆稱

海城縣志

卷五 人物 烈女

四十一

之年六十而卒

黃氏 邑東北台溝樊國平妻父國恩居火龍寨年十八于歸二十八夫故只二女矢志守義孝奉翁姑以夫兄子成章爲嗣撫養成立翁姑歿每祭必潔蘋蘩以致誠敬歷四十餘年人咸敬之

王氏 邑西荒嶺子巴永富妻長店舖王姓女幼失怙恃童養於巴十七歲作婦越二年而孀遺腹生一女貧不自給或勸以改醮氏曰婦人從一而終寧餓死決不再醮遂傭於富室韓氏韓亦嫠婦憐氏母女優遇之居韓四十年積有微資晚年歸家繼姪來福爲嗣卒年七十

郭氏 邑東南石柱溝任德謙妻八岔溝郭耀祖之女年二十一于歸德謙就學於外相見日少面貌尙未熟識而德謙卒氏矢志守義繼夫兄德和子韶年爲嗣尋德和又卒韶年遂



兼祧氏教子持家劬勞備至年七十七卒經邑紳呈請旌表如例

戚氏 邑西前三家子李清春繼室二十歲歸李前室遺一女撫愛有恩二十四歲夫卒生遺腹子廣生氏以撫孤自矢翁姑欲奪其志虐遇萬狀人所難堪氏順受無違翁姑益怒逐出之氏率子女居母家數載後翁姑病衰氏還奉養以終教子女成立鄉里嘖嘖稱歎子長有孝行治家小康氏七十九歲卒

王氏 前三家子程鵬奇妻牛莊王氏女年十七適程貞靜賢淑事翁姑以孝稱生子樹本而夫遽卒氏年二十一奉老撫幼矢志靡他苦節近六十年卒

黃氏 邑西南西劉公屯姜某之妻二十三居孀孝奉翁姑歷三十年毫無異志近以家貧憂勞目失明翁姑均近耄齡度日維艱乃節婦中極苦者

民國

海城縣志

卷五 人物 烈女

四十二

徐氏 邑北小台溝姜萬祥妻本村徐德興女夙嫻女誠年十七于歸二十七夫故一子永耀尙幼氏守義撫孤歷三十餘年

陳氏 城內韓志魁妻年二十四居孀翁姑早世一子光琳甫四月氏苦志撫孤尤重孝義異居伯姑遘時疫瀕危舉族莫顧氏親侍歷三晝夜疾竟瘳生平多善行如養夫乳母巴氏終身並代聘其女濟夫族兄志復族姪光成及夫表兄鸞鳳翔等前後共耗資千餘金年五十一卒人多哀之民國六年邑紳爲請褒揚蒙大總統頒賜志潔行芳匾額

王氏 邑南鄧家台韓志芳妻母家丁家橋十八歲守孀只一女事翁姑三十餘年孝敬如一日鄉里咸欽之年五十一卒

高氏 鄧家台韓光琇妻年十九夫卒子啓昌甫周歲氏深明大義苦志撫孤長齋奉佛終歲不出庭戶清操二十餘年訓啓昌成立四十七歲卒民國三年邑紳爲請褒揚蒙大總統



頒賜朗潔冰清匾額

陳氏 鄧家台武庠生韓光澤繼室勒馬峪陳氏女也二十九歲夫故善事翁姑姑老病痿服事至十五年無一刻懈前室遺一子二女氏撫愛周至不啻己出子瑞昌武庠生於民國十一年爲母請褒揚如例

魏氏 邑庠生韓光恩妻同邑候選知縣魏常五之妹也幼失怙恃讀書明大義年十七歸韓氏事翁姑克盡婦道二十九歲夫故子二金昌連昌俱幼氏親自課讀寒暑無間稍長俾入學校金昌在本城中學畢業連昌在北京大學畢業其操行根柢母教爲多

陸氏 邑東木子溝仲兆泰妻樓房陸中立之女年十八于歸二十四歲守孀翁姑在堂事奉惟謹只一女繼夫弟子躋堂爲嗣甫五歲撫愛如己出苦節近六十年里人皆賢之

王氏 城內李雲天繼妻邑東木子溝王者章次女幼讀書明大義年二十四孀居繼族姪

海城縣志

卷五 人物 烈女

四十三

鴻緒爲嗣娶媳孫氏將三載嗣子又夭時姑已七旬孫純業甫六月氏率寡媳日以孝姑撫孫爲事庚子秋避亂木子溝課孫讀書村中子弟就學者悉教之不取資一生喜勤持家有法門內肅然媳孫氏母家城內二十四歲而釐日隨孀姑事祖姑愉色柔聲朝夕無倦祖姑歿事姑亦如之一門雙節人咸嘉之有孫四人家業日昌

蕭氏 邑西小碼頭金聚田妻哈睦碑蕭恒安長女年十五歸金躬操井臼克盡婦職二十九歲夫被瘰狗噬傷殞命時長子四齡遺腹次子尙未誕生家赤貧翁姑及伯翁姑均年老氏以針黹奉養老撫藐孤竭蹶萬狀毫無他志後四老人皆以壽終二子俱成立苦節三十餘年尙未褒揚

張氏 邑東北腰屯劉國彩妻北二台子張維屏女也夫經商於外遽疫死姑在堂小姑幼子永禎齒尤穉家無儋石儲或勸以改醮氏曰姑老子幼棄之不仁寧餓死肯苟活耶氏精



針黹藉以度日積久小裕子成立有孝行

于氏 邑東梧樹屯喬桂芳妻中年夫歿家無寸產遺二子一女餬口維艱親鄰咸以改嫁勸志終不搖苦節三十餘年竭蹶萬狀實貧婦中所罕有者

張氏 邑南小河趙開辰妻牌樓屯張輔本女性淑慎女紅勤敏中歲夫故遺二子繼殤家綦貧只老姑在堂終歲善病氏以針黹易甘旨進則和容悅語以取姑歡退則思子念夫血淚流盡見者莫不傷之姑以天年終喪葬如禮氏茹素禮佛潔志清修近三十年積累小有繼從姪中孚爲嗣尙未褒揚

谷氏 小河盧崇山妻大富甲屯谷萬科女年十七于歸逾二年夫卒氏無出翁姑垂老矢志代夫奉親歷三十餘年戚里以賢孝稱撫姪爲嗣教養成立以延似續云

畢氏 邑東南三角山張角弓繼室父金庫居宋家峪年二十三適張能盡婦職年近三十舉一子開榜夫故撫孤度日力行節儉晚歲將先人典出遺產悉數贖回

李氏 邑南黃單屯烏家堡子李柏泉繼室年二十一于歸甫六月夫亡翁姑俱在前子玉柱甫四歲氏事翁姑孝撫前子慈家貧志終不渝子長能善事母一門慈孝遠近稱之

岳氏 邑東南海龍川李紹均繼妻岳文泰之次女生而賢淑事姑郭氏有孝行姑晚年病痿輾轉需人氏奉事惟謹歷二十餘年毫無倦容待前子不啻己出中年夫卒訓子有方人稱氏少年爲孝婦中歲後則爲賢母云

李氏 邑西南祥水泡庠生王化行妾騰鷺堡李森女年二十八適王逾年化行卒無出繼姪明善爲嗣甫一歲與嫡同志撫孤數年嫡歿氏率子度日貞操苦節三十餘年子學成有聲鄉里咸嘉之

呂氏 邑西南西廟山子陳明橋妻呂鳳桐女年二十一于歸逾二年夫病危禱於神願減



已壽以代夫終無效時翁姑垂老一女在抱矢志守義後翁姑歿喪葬悉氏爲之一生貞節百折不撓歷五十餘年卒

梁氏 邑南土台子附生孟昭欽妻官屯梁維常長女性淑慎年十九歸孟甫四月夫故無出繼夫兄次子憲章爲嗣甫三歲殷勤撫養愛如己出氏以義命自安冷兩孤燈紡績不輟歷四十年鄉里皆賢之

劉氏 邑西蘇家堡子蘇志純妻一子甫七齡夫亡氏矢志守孀事翁姑恭謹無違撫孤子教訓有方苦節三十餘年尙未褒揚

孫氏 邑人王悅廷妻父洪憲居城西二台子氏八歲喪母賴祖母撫育年十七適王姑患痰疾奉事悉慰姑心夫外出未及歸而姑歿夫歸未幾亦歿逾二載翁又故家益式微撫四齡孤兒艱難度日歷四十餘年子成立師範畢業充國民學校教員

海城縣志

卷五 人物 烈女

四十五

王氏 邑人丁貴金妻大富甲屯王福全女性淑善喜勤勞二十四歲夫故只一女姑痛子亡中癩疾晝夜出走氏出入追隨辛苦萬分夫弟妹數人俱幼小賴氏撫慰姑心安疾漸以瘳庚子之役舉家逃東山亂粗定翁姑念家先歸氏又冒險隨侍女嫁後病亡繼姪以續夫祀苦節三十餘年尙未褒揚

齊氏 邑西北新開河王世源妻年二十一嫠居遺一女繼姪廣一爲嗣事翁姑以孝後子成室女出嫁皆窘於資氏歷萬難以完成之守節四十餘年民國九年蒙大總統頒賜節勵松筠匾額

湯氏 邑西小姐廟周起賓妻湯兆喜女也年二十七夫染疫歿時翁姑垂老子富恒甫八歲度日維艱撫子成立守節歷四十年里人賢之

張氏 小姐廟馬貴之妻二十歲守孀繼夫兄九齡子爲嗣帶田百餘畝歸夫兄家撫養嗣



產被夫子兄耗去大半日後連遭荒澇田產售賣一空艱難度日始終無怨言苦節五十餘年尙未褒揚

劉氏 邑北古城子處士孫登科妻父維邦居耿莊子氏二十五歲居孀事孀姑盡孝子延斌甫一歲教養成立充陸軍旅部軍需官氏苦節三十餘年尙未褒揚

羅氏 邑西北秦家堡子洪承賢妻處士羅濟川女也二十一歲于歸越三載夫故子恩忱將彌月撫孤成立守志三十餘年尙未褒揚

林氏 邑北耿莊子劉鳳池妻林萬寶女也年二十二歲居夫無兄弟氏恐劉氏祀殄勸翁納妾生子九歲而殤不數歲翁故氏乃擇族姪春旭承祀其深明大義始終以宗祀爲重人尤賢之

佟氏 邑人蘇正芳妻侯爵屯佟允兆長女子歸二載夫故上有老姑下有幼子家貧無立

海城縣志

卷五 人物 烈女

四十六

雖地氏藉針黹度日奉姑以孝聞撫子成立苦節四十餘年

徐氏 邑北白廟子庠生劉際和妻甲午亂後夫故遺子三女一均幼貧不自給藉傭工以生活所居村會房契紙註劉唐兩家先人名唐與會爭房起訴法庭按契判房歸劉唐兩家管業氏承先志仍施房歸公決不收回道德節操時窮乃見不愧爲劉家婦也

張氏 邑北姚千戶屯高廷貴妻張純之女幼嫻女誡入高門善事翁姑年二十八夫故無出矢柏舟志日事紡織不出門戶繼姪舉功爲嗣撫養成立舉功又無子繼子昇子承祧氏守孀近五十年尙未褒揚

馬氏 姚千戶屯周慶起妻馬成林之女二十一歲夫故無子貧苦無依以針黹濟生活守節近四十年尙未褒揚

白氏 邑北楊相公屯穆峻峰妻母家湯爾河二十二歲守孀苦節五十餘年尙未褒揚



葉氏 揚相公屯王恩堂妻母家東樹林子二十二歲夫亡守義三十餘年尙未褒揚

金氏 邑北金甲台吳正清妻年二十二歸吳逾二載夫故遺一子尙在襁褓家道寒微紡織自給教子成立苦節逾三十年

關氏 邑北蘇家台于占中妻二十二歲而孀苦節五十餘年尙未褒揚

劉氏 邑北土河鋪王永福妻邑人劉寶金女二十七歲于歸逾年夫故矢志守節三十餘年

姚氏 土河鋪王永和妻林同峪姚宏廣女年十七于歸中年夫故含辛茹苦矢志不移里黨稱之

穆氏 邑北筆管堡蘇永恩妻父維辰居秦家堡子二十一歲守孀無子女時翁年八十姑年六十餘貧苦度日事翁姑以孝後翁姑繼歿喪葬以禮近支無姪可嗣乃繼孫正讓承祀

海城縣志

卷五 人物 烈女

四十七

苦節四十餘年已蒙褒揚

劉氏 邑北騰鰲堡王廷安妻十八歲孀居無子女家貧賴針黹餬口備嘗辛苦矢志靡他歷三十餘年鄰里賢之

孝婦附

于氏 邑西關沙河沿張松生妻西糧窩于恒有女勤慎端謹年十七于歸有孝行姑先歿翁德春年老患腿疾不能下牀者七載松生一身應外事氏侍疾曲體翁心每膳爲具數品熟後請翁願食某品則急取以進入問之氏曰年老脾衰食思欠乏其能食全在一觸之興倘先問後具則興易索能加餐耶翁臥病久股壓成瘡爲作鷄毛褥以油布羃其上汚則易而滌除之氏女福姑甫十齡能佐母事祖每大溲氏扶起福姑進器承之翁臨歿神志昏愢溲溺不知澣濯尤勤不使牀席微有惡臭氏幼子殤恐傷翁心飾詞隱諱終翁之世不知三



孫已死氏多淑德其事翁疾尤嘖嘖人口咸歎爲難能云

海城縣志

卷五 人物 烈女

四十八



烈婦

清

郭氏 邑西北仙里村田肇玉妻大路沿郭萬金之女同治五年三月初十日馬賊陷牛莊氏與其娣劉氏携子女避難匿某商號後院時當危急與娣計曰女子最重者名節也與其辱而生何若潔而死乃先勒斃二女即同投繯而死時氏子樹人尙幼後入邑庠爲母請旌表從祀節孝祠

劉氏 田肇璽妻耿莊子劉氏女也同治五年馬賊破牛莊與郭氏同時殉節聞者烈之後與郭氏同蒙旌表入祀節孝祠

金氏 邑東南楊家店侯輔順妻母家金家牌房年二十三夫卒只遺一女誓守義奉祖姑以孝癯居十載言笑不苟見者凜然夫兄輔芝嗜賭博航鴉片數歲蕩產殆盡計舉家北徙

海城縣志

卷四 人物 烈女

四十九

氏娣勸之曰趁此時機正可改醮遠徙多叵測汝又無出何戀戀爲氏峻拒不從聞行期已迫率女哭夫墓即於是夕納毒餅中女先食蒙被以臥至中宵皓月當空乾坤一色氏換清潔衣履從容仰藥以盡時光緒二十一年十月十五夜也天明家人驚覺氣已絕面如生身容舒展咸歎異之合葬夫墓女踵溼其側

王氏 邑西牛莊平某之妻附生寅生之妹也甲午之亂日人陷牛莊倉猝不及逃避氏以青年懼喪名節遂投井而死貞烈可欽

彭氏 牛莊北關李某妻彭延茂女光緒甲午中東戰事起家人逃難離散無歸氏以年少倘被賊掠名節何保遂仰藥自盡聞者哀之

何氏 邑人楊九如妻三台子何姓女年二十而孀無出繼夫弟九富次子殿榮爲嗣光緒二十六年拳匪之亂俄軍陷城肆行淫掠氏懼辱投井以死逾年邑紳爲請旌表奉旨允准



建坊入祀節孝祠

王氏 邑西藍旗堡羅某妻牛莊王孝廉惟康女也年十七于歸二十二歲夫亡無子氏生長名門深明大義遂仰藥殉夫因格於成例未獲旌表

民國

熊氏 牛莊趙德純繼妻小干戈舖熊兆吉女于歸數月夫以供差積勞致疾及病革氏先脫釵釧付祖姑問之以時將理喪不能兼顧對從容爲夫摒擋殮具井井就緒少選自言憊甚入內小憩天四鼓聞室內呻吟衆趨視息已微口吐涎沫知吞鴉片救之不及比明氣絕夫繼卒

孔氏 邑北柳河子邱樹仁繼室孔家屯孔繁純女也素嫻閨訓年二十二于歸樹仁在日本早稻田大學校肄業民國九年回籍是年八月八日病卒前一日氏見夫不起即絕粒及

海城

縣志

卷五

人物

烈女

五十

歿水漿不入口至七日仍未死又私剪金吞服氣始絕氏素賢孝及殉夫先以奉姑事重託嫂氏情真語痛聞者咸爲感泣

龐氏 邑北新台子孫納福妻納福充黑龍江綏楞縣鹽務局差於民國七年八月卒及家聞訃已越三日至六月夜子家人迎七致祭氏乘人不備踰垣投井以殉年二十二



貞女

清

劉貞女 邑西牛莊劉富榮女父業屠女幼字同城李和未幾和盲且癱和父母以兒已廢疾不忍悞女議離婚女家樂從獨女堅持不允繼以哭泣事遂寢而李家終不言娶女年二十七李和病故已殯報訃女家一門咸願女獨慘然默無一語越日潛出尋至夫家抱姑痛哭自陳守義出自素志姑勸之歸不聽無何父踵至尤期期以爲不可仍弗聽繼之以怒聲動四隣觀者填巷紛囂間邑紳恩鳳丹至力持正論始將女父勸歸而女遂家於李甘食貧以盡婦職居數載病庭道光元年八月十四日卒臨歿囑姑曰願得乾淨土與夫合葬目始瞑姑從其言爲置地合葬嗣經邑紳請旌建坊六通橋畔

李貞女 邑人李建魁女幼字趙德海年十七未歸夫卒時女在姨母家晨起忽自痛淚漣

海城縣志

卷五 人物 貞女

五十一

潛下莫解何故急歸家始知壻於是時病歿遂更素服請往守義父母大驚以女年太稚恐貽後悔不許女絕粒瀕死父母懼允商壻家以從其志女始食翁恩魁亦以女年少輕出此言堅拒不允女無奈即茹素以明志誓終身不嫁父母漫許之既而兩次論婚悉以死爭父母見女志不移乞翁來勸聆女言悽惻動人始知其志堅鐵石也不忍再拒允以三週時迎歸至期以彩輿往迓先謁夫墓觀者雲集皆爲感泣忽爾黑雲陡起風雷交作大雨滂沱獨墓地無雨得從容成禮而去咸嗟異之女歸趙八載婦道無虧光緒二十五年四月十八日病卒歿時態度安閒鄰人咸聞音樂聲鏗鏘空際移時始杳云

民國

楊貞女 邑西何沙河沿楊自榮女幼字同里曹俊鏞年十九未歸夫故女請赴夫家守義父母弗許女啜泣不食母恐給之曰如飲食必從汝志女遂食母故延緩冀日久情疎可轉



園也女窺知母意逾年夫小祥日家人祭墓女乘隙奔夫墓哭弔兄嫂踵至並翁姑同勸均不從即於墓前成禮以歸於曹居久之耆老嘉女節特贈貞操節烈匾額翁姑歿夫兄弟析居女自除一室閉戶奉佛規矩嚴肅人莫敢窺時有紫芳屯王姓女守貞不字與楊女親善遂合產同居凡操勞外務王女任之無事時即與楊女焚香誦經寅夜不輟云

王貞女 農家女月牙子張國彙之未婚妻也年十九夫故聞訃欲奔喪家人力阻之女不從時值隆冬竟冒風雪履冰霜以往舅姑及親屬悉勸女歸皆不聽遂服衰絰展夫墓比歸供夫木主於室朝夕焚香以奉事舅姑菽水承歡不以貧稍失孝敬某歲大饑朝不保夕女挑菜拾薪以供舅姑之養久之邑紳見女操行堪以風世爲請旌建坊時咸稱之

孫貞女 城東頭台子孟連芳未婚妻籃旗口孫成全之女未結縭而夫故女聞訃即欲奔喪父母不許女晝夜涕泣堅言守義決不再字久之父母見其志終不移於夫三周期送女

就墓成禮遂歸於孟事孀姑孝處妯娌和躬操井臼執婦道無虧戚里皆賢之貞操幾二十  
年尙未褒揚



烈女

清

杜姐 邑節孝祠內有一木主書烈女杜姐之位年代事蹟均不可考然既稱烈女又蒙旌表必其舍生全節不爲強暴所辱如遼陽劉四姐者無疑迭經日俄兵燹祠內木主多毀惟杜姐之牌巍然獨存亦異事也

劉氏 邑西三台子劉汝藩女同治五年馬賊竄擾各村汝藩携二女及甥女避難牛莊居富室洪姓宅城陷三女恐被污跪地齊聲乞死汝藩剛烈士也遂手刃三女以保其節而遂其志聞者壯而憫之



孝女

清

朱孝女 邑南老爺廟八里河朱朝仁之女母孫氏生二女無子長適同里王姓女年及笄父母爲論婚女慨然曰親無男女嫁親無依生女何用願居家養父母以終勸之不可朱故貧女紡績奉親近二十年親歿爲營喪葬纒絰扶櫬儼然男也大事畢女已三十八歲遂守貞不字以獨居無依携產與姊共炊另除一室終日閉戶以誦經禮佛爲事門臨河歲出資構板橋以便行人年六十二卒同時有山後呂姓女臨嫁夫歿誓不字與朱女結爲姊妹不時往還時並稱之

張孝女 邑庠生張拱辰女拱辰晚年衰病與老妻蕭氏同臥床榻一子無正業日與蕩子遊夫妻所賴以殘喘者惟一弱女井臼躬操湯藥親侍牀前服役悉女竭力爲之如是者二

海城縣志

卷五 人物 烈女

五十四

年而母卒嗣後父女二人相依爲命逾歲父病益篤彌留時音啞不能言但顧女淚出如瀦女曰父以女無歸而心緣未了乎女雖愚素承慈訓不幸與父訣後事自有主張時門人魏憲綸在側聞之以女所言特慰父之詞未必有他變也父卒女經營喪葬諸事井然發引送殯還遂飲藥而死時年十九事在光緒二十五年

武英 邑南石柱溝武昭姊也三歲失怙越四月弟昭生零丁孤苦寡母率以度日道光二十三年四月昭患時疫瀕死母爲預備後事英恍然念昭身關宗祀必不可死遂虔誠祈禱泣血呼天願以身代至誠所感不數日姊歿而弟甦矣女卒年十六逮昭成立感姊義特建碑以表揚之